



Broj: 01- 166 /12  
Datum: 17.07.2012. godine

17-07-2012

BOSNA I HERCEGOVINA  
PARLAMENTARNA SKUPŠTINA BOSNE I HERCEGOVINE  
SARAJEVO

Organizaciona jedinica	Klasifikaciona oznaka	Redni broj	Broj prijave
		17.07.2012	
05/8-50-19-916/12			

**BOSNA I HERCEGOVINA  
PARLAMENTARNA SKUPŠTINA  
BOSNE I HERCEGOVINE**  
Komisija za izbor i praćenje rada Agencije za prevenciju  
korupcije i koordinaciju borbe protiv korupcije  
n/r predsjedavajuće gđe. Dušanke Majkić

**PREDMET: Izvještaj o radu Agencije za prevenciju korupcije i koordinaciju borbe protiv korupcije za period 01.01.2012. do 30.06.2012. godine, dostavlja se**

Poštovana,

U skladu sa članom 18. stav (1) tačka b) Zakona o Agenciji za prevenciju korupcije i koordinaciju borbe protiv korupcije u prilogu Vam dostavljamo Izvještaj o radu Agencije za prevenciju korupcije i koordinaciju borbe protiv korupcije za period 01.01.2012. do 30.06.2012. godine.

S poštovanjem,

**PRILOG: Izvještaj o radu Agencije za prevenciju korupcije i koordinaciju borbe protiv korupcije za period 01.01.2012. do 30.06.2012. godine**

Dostavljeno:

- Naslovu,
- a/a.



**DIREKTOR**

**mr. Sead Lisak**



**IZVJEŠTAJ O RADU  
AGENCIJE ZA PREVENCIJU KORUPCIJE I  
KOORDINACIJU BORBE PROTIV KORUPCIJE  
ZA PERIOD 01.01.2012. DO 30.06.2012. GODINE**

**Juli 2012. godine**

## UVOD

Članom 18. stav (1) tačka b) Zakona o Agenciji za prevenciju korupcije i koordinaciju borbe protiv korupcije ( "Sl.glasnik BiH" 103/09) utvrđena je obaveza da Agencija najmanje dva puta godišnje dostavlja izvještaj o radu Komisiji za izbor i praćenje rada Agencije.

Neusvajanje Prijedloga pravilnika o unutrašnjoj organizaciji Agencija za prevenciju korupcije i koordinaciju borbe protiv korupcije, te kašnjenje sa usvajanjem budžeta institucija Bosne i Hercegovine za 2012. godinu, ključni su razlozi nepostojanja zaposlenih, uredskog prostora, opreme za rad i ostalih sredstva neophodnih za nesmetano funkcioniranje Agencije.

Strategijom za borbu protiv korupcije (2009.-2014.) i Akcionim planom za njenu provedbu usvojenim 2009. godine predviđeno je da se do kraja 2014. godine, izgrade kapaciteti Agencije koji bi osigurali efikasnu sprovedbu programa za prevenciju korupcije, edukaciju društva i podizanje svijesti o rizicima od korupcije, koordinaciju borbe protiv korupcije, pružanje potrebne pomoći nadležnim organima u otkrivanju i provjeravanju slučajeva korupcije, te, u skladu sa Zakonom o Agenciji, davanje neophodnih preporuka, mišljenja, instrukcija za efikasniju prevenciju i borbu protiv korupcije na svim nivoima i u svim segmentima bh društva, a u skladu sa Zakonom o Agenciji.

Funkcioniranje Agencije u punom kapacitetu i u skladu sa Zakonom o Agenciji, te početak realizacije zadataka i obaveza postavljenih pred Agenciju kroz Strategiju i Akcioni plan za borbu protiv korupcije za period 2009.-2014. godine, ovisilo je prvenstveno od imenovanja njenog rukovodstva, osiguravanja adekvatnog smještaja, usvajanja budžeta i zapošljavanja osoblja, a za što je bilo neophodno usvajanje Pravilnika o unutrašnjoj organizaciji Agencije.

Izvršavajući svoju zakonsku nadležnost iz Zakona o Agenciji, Agencija je blagovremeno izradila prijedlog pravilnika o unutrašnjoj organizaciji.

Iako je Prijedloga pravilnika o unutrašnjoj organizaciji u zakonom predviđenom roku od 90 dana od dana imenovanja rukovodstva Agencije, tačnije 16. decembra 2011. godine, upućen Vijeću ministara BiH na davanje saglasnost, i uz prethodno pribavljena mišljenja nadležnih institucija Vijeća ministara BiH, on nije dobio potrebnu saglasnost do kraja ovog izvještajnog perioda.

U ovom uvodnom djelu Izvještaja moramo istaći činjenicu da je donošenje Pravilnika o unutrašnjoj organizaciji ključni preduslov uspostavljanja materijalno-tehničkih i kadrovskih pretpostavki za početka rada i funkcioniranje Agencije u skladu sa Zakonom o Agenciji.

## PROBLEMI U FUNKCIONIRANJU AGENCIJE

S obzirom na zaključke Komisije za nadzor i praćenje rada Agencije, te zaključke Parlamentarne skupštine Bosne i Hercegovine, smatrali smo da je neophodno da i kroz ovaj izvještaj upoznamo Komisiju za izbor i praćenje rada Agencije i Parlamentarnu skupštinu BiH o problemu oko neusvajanja Pravilnika o unutrašnjoj organizaciji Agencije.

Na 5. Sjednici Vijeća ministara BiH, zakazanoj 30. marta 2012. godine, dnevnim redom predviđeno je razmatranje Pravilnika o unutrašnjoj organizaciji Agencije za prevenciju korupcije i koordinaciju borbe protiv korupcije. Kako je ta sjednica u više navrata odgađana i prekidana, predloženi Prijedlog pravilnika je uvršten u dnevni red sjednice koja je održana 18.4.2012. godine, ali je i tada odgođeno davanje suglasnosti na Prijedlog pravilnika.



Zaključkom, kojim nas je dopisom od 23. aprila 2012. godine obavijestio generalni sekretar Vijeća ministara BiH, obavješteni smo da je Vijeće ministara BiH odgodilo razmatranje Prijedloga pravilnika uz zaključke da se smanji planirani broj izvršilaca (nije navedeno za koliko bi trebalo smanjiti broj izvršilaca) i da se u tekst pravilnika ugrade sugestije Ministarstva pravde BiH.

Agencija je postupila po zaključku Vijeća ministara BiH, ugradila sugestije Ministarstva pravde BiH, te ranije predloženi broj izvršilac sa 57 smanjila na 45. Time smo ukinuli dvije unutrašnje organizacione jedinice, uz smanjenje broja izvršilaca i u drugim organizacionom jedinicama. Nakon toga, 24.04.2012. godine, dostavili smo Vijeću ministara BiH izmijenjeni Prijedlog pravilnika sačinjen na osnovu smjernica iz zaključaka Vijeća ministara BiH. Kako do 15.05.2012. godine nije na dnevnom redu Vijeća ministara BiH uvršteno davanje saglasnosti na Prijedlog pravilnika, pismenim putem zatražili smo stav i mišljenje od Generalnog sekretara Vijeća ministara BiH.

Reakcija na naš dopis bila je, 17.05.2012. godine, vraćanje Agenciji cjelokupnog materijala (Prijedlog pravilnika) uz zahtjev da na izmijenjeni tekst ponovo od Ureda za zakonodavstvo, Ministarstva pravde BiH i Ministarstva finansija i trezora BiH zatražimo nova mišljenja, što smo i učinili. Nakon što smo dobili pozitivna mišljenja Ureda za zakonodavstvo i Ministarstva finansija i trezora BiH, iz Ministarstva pravde BiH stiglo nam je mišljenje sa određenim sugestijama koje smo u potpunosti prihvatili.

Novi tekst Prijedloga pravilnika ponovo smo 7. juna dostavili Vijeću ministara BiH na saglasnost. Nekoliko dana poslije toga dobili smo poziv iz Generalnog sekretarijata Vijeća ministara da predstavnik Agencije prisustvuje sjednici Vijeća ministara BiH, zakaznoj za 20. juni, kako bi mogao odgovoriti na eventualna pitanja oko Prijedloga pravilnika. Uvažavajući potrebu ministara, direktor Agencije se odazvao pozivu na sjednicu. Pitanja su se najvećim dijelom odnosila na ranije navedene primjedbe Ministarstva pravde BiH, iako je razlog njihovog neuvrštavanja u novi tekst Prijedloga pravilnika u pismenom obrazloženju dostavljen Vijeću ministara BiH<sup>1</sup>.

U međuvremenu, iz Generalnog sekretarijata Vijeća ministara BiH u Agenciju je stiglo obavještenje da se predloženi Prijedlog pravilnika ponovo vraća predlagaču na doradu, kako bi u njega bile ugrađene sugestije koje su se mogle čuti tokom posljednje sjednice Vijeća ministara BiH. Iako zvanično, odnosno pismeni putem nismo dobili smjernice o tome šta bi trebalo izmijeniti u Prijedlogu pravilnika, odnosno koje sugestije je potrebno uvrstiti, prema bilješkama koje je direktor Agencije sačinio tokom sjednice Vijeća ministara BiH, pristupilo se izmjenama Prijedloga pravilnika.

Na naš zahtjev dogovorili smo razgovor sa ministrom Barišom Čolakom i predstavnicima Ministarstva pravde BiH kako bi otklonili eventualne nedoumice oko dostavljenog mišljenja. Na obostrano zadovoljstvo mišljenje je korigirano i kao takvo dostavljeno ponovo uz Prijedlog pravilnika Vijeću ministara BiH na davanje saglasnosti.

Podsjećamo na neophodnost usvajanja Pravilnika Agencije ukazao je i Zastupnički dom/Predstavnički dom Parlamentarne skupštine Bosne i Hercegovine, koji je nakon rasprave o Informaciji o stanju i problemima u funkcionisanju Agencije, na 28. sjednici održanoj 24.05.2012. godine donio zaključke, među kojima je i taj da Vijeće ministara BiH u roku od 15 dana od prijema zaključaka treba dati saglasnost na Pravilnik o unutrašnjoj organizaciji Agencije i, također, na Kodeks ponašanja zaposlenih u Agenciji.

Do kraja izvještajnog perioda, period od 01.01. do 31.06.2012. godine, Vijeće ministara BiH nije dalo saglasnost na Prijedlog pravilnika o unutrašnjoj organizaciji Agencije i na Kodeks

<sup>1</sup> Komentare na prijedlog pravilnika dali su ministar Sredoje Nović, zamjenik ministra Srđan Radalj i zamjenik ministra Mirko Okolić

ponašanja zaposlenih, što je bilo ključni razlog ne uspostave institucionalnih kapaciteta Agencije, odnosno opremanja i kadrovskog upošljavanja kao ključnih pretpostavki za efikasno funkcioniranje Agencije.

## KADROVSKO POPUNJAVANJE

Neusvajanje Pravilnika o unutrašnjoj organizaciji Agencije, ali i kašnjenje sa usvajanjem budžeta institucija BiH za 2012. godinu, uzrokovalo je poznate probleme Agenciji, tako da se i u 2012. godini zadržalo stanje iz 2011. godine. Agencija je i kraj šestog mjeseca 2012. godine dočekala sa svega tri zaposlena – direktorom i dva zamjenika. Pored tri stalno zaposlena, u izvještajnom periodu angažirana su i četiri izvršioca po ugovoru o djelu, koji su obavljali osnovne poslove u Agenciji neophodnih za zakonito funkcioniranje Agencije (finansijski i blagajnički poslovi, komunikacija s medijima i poslovi tehničke sekretarice u Agenciji).

Prvim Prijedlogom pravilnika o unutrašnjoj organizaciji u Agenciji je bilo sistematizovano 57 izvršilaca, od kojih je planirano da se uposli 27 tokom 2011. i 2012. godine, te ostatak u godinama koje slijede. Međutim, Vijeće ministara BiH na 5. sjednici održanoj 18.4.2012. godine bez razmatranja Prijedloga pravilnika donijelo je zaključak da je potrebno smanjiti predloženi broj izvršilaca. Postupajući po zaključku Vijeća ministara BiH izmijenili smo Prijedlog pravilnika na način da smo ukinuli dvije osnovne organizacione jedinice, a u ostalim organizacionim jedinicama smanjili planirani broj izvršilaca za ukupno 12 čime smo sveli sistematizovani broj zaposlenih na 45.

Prema dinamičkom planu upošljavanja na kraju 2012. godine u Agenciji je trebalo biti zaposleno 27 izvršilaca. S obzirom na činjenicu da u 2011. godini nije uposleno 15 planiranih izvršilaca, dinamičkim planom za 2012. godinu predviđeno je da budu zaposleni planirani izvršioci iz 2011. godine i devet izvršilaca planiranih u 2012. godinu. Uz direktora i dva zamjenika ukupan broj izvršilaca na kraju 2012. godine trebao je da bude 27.

Međutim, projekcijom usvojenog Budžeta BiH za 2012. godinu, odobrena novačana sredstva u iznosu od 350.000 KM dovoljna su za plaće 15 zaposlenih u Agenciji, uključujući direktora i zamjenike. Prijem i zapošljavanje planiranih 12 izvršilaca može otpočeti od 01.09.2012. godine odnosno 1.10.2012. godine prema dinamici odobrenih raspoloživih novčanih sredstava za te namjene.

Naime, u Mišljenju Ministarstva finansija i trezora BiH na Prijedlog pravilnika o unutrašnjoj organizaciji Agencije navodi se da to ministarstvo nije ulazilo u suštinu definiranih profila i broja izvršilaca, uvažavajući težnju Agencije da takvim ustrojstvom teži jačanju kapaciteta, efikasnosti i kontroli procesa rada, te primjeni važećih propisa ali je prema projekciji budžeta BiH za 2012. godinu planiran novac za ukupno 15 zaposlenih (uz direktora i dva zamjenika) do kraja 31.12.2012. godine, te da Agencija puni kapacitet zaposlenosti može planirati tek na kraju treće godine planskog ciklusa Dokumenta okvirnog budžeta za period 2012.-2014. godina“.

Zbog neusvajanja Pravilnika do kraja izvještajog perioda nisu započete procedure upošljavanja.



## SMJEŠTAJ I MATERIJALNO-TEHNIČKO OPREMANJE

Odluke o privremenom finansiranju, za prvi i drugi kvartal 2012.godine, i neusvajanje Prijedloga pravilnika o unutrašnjoj organizaciji Agencije, potpuno su blokirali rad Agencije u prvih šest mjeseci 2012. godine.

Iako su se zbog neusvajanja budžeta za 2012. godinu sve institucije u BiH našle u teškoj situaciju, nepostojanje budžeta Agencije, kao novoformirane institucije, stavilo nas je u znatno složeniji položaj od ostalih institucija. Agencija nije mogla pristupiti operacionalizaciji predviđenih sredstava za potrebe zakupa prostora. Problem smještaja Agencije privremeno je riješen krajem 2011. godine kada su nam bez naknade ustupljene tri prostorije u zgradi Državne agencije za istrage i zaštitu-SIPA u Istočnom Sarajevu.

Obzirom na činjenicu da osim direktora i dva zamjenika nema zaposlenih u Agenciji, zakup prostora trebao bi biti realiziran neposredno prije početka zapošljavanja planiranog osoblja. Na taj način Agencija će planirano uštedjeti novac za zakup prostora do njegovog popunjavanja. U toku su aktivnosti na pronalaženju smještajnog prostora na području Istočnog Sarajeva.

Uz navedeno zbog neusvajanja budžeta u izvještajnom periodu nije se moglo pristupiti materijalno-tehničkom opremanju Agencije.

## NAJVAŽNIJE AKTIVNOSTI

Kada je riječ o onome što je rukovodstvo skoro potpuno kadrovski i materijalno-tehnički blokirane Agencije uspjelo uraditi u prvih šest mjeseci 2012. godine u najkraćim crtama navest ćemo samo ono najvažnije i to:

- Agencija za prevenciju korupcije i koordinaciju borbe protiv korupcije sa Transparency international BiH (TI BiH) potpisala je Memorandum o razumijevanju. Oblast saradnje obuhvaća praćenje provedbe Strategije za borbu protiv korupcije, organizaciju u učešće na obukama, seminarima i radionicama. Tim činom dat je legalitet institucionalnoj saradnji Agencije i TI BiH u BiH, zasnovanoj na načelima partnerstva, odgovornosti, transparentnosti i međusobnog povjerenja.
- Agencija za prevenciju korupcije i koordinaciju borbe protiv korupcije sa Centrom za civilno društvo „Kyodo“ potpisala je memorandum o saradnji, koja će se temeljiti na načelima partnerstva, transparentnosti, odgovornosti i međusobne informiranosti. Ovim memorandumom ugovorne strane su se obavezale da će kroz redovnu razmjenu informacija i zajedničke aktivnosti posebno saradivati na realizaciji dijela projekta „Legal Anticorruption Network-Pravna antikoruptionska mreža“.
- U februaru 2012. godine zvanično je puštena u opticaj web-stranica Agencije, koja je izrađena uz finansijsku pomoć EUPM-a. To predstavlja prvi korak ka transparentnom radu ove institucije, koja će biti u službi građana BiH. Osim toga, građanima BiH omogućeno je elektronskim putem da prijave korupciju.
- Rukovodstvo Agencije 24.januara održalo je sastanak sa pravobraniojcima Pravobranilaštva BiH tokom kojeg je posebno razmatrano pitanje oduzimanja imovinske koristi stečene izvršenjem krivičnih djela.
- Parlamentarnoj skupštini BiH u aprilu je, na osnovu prethodno prihvaćene inicijative poslanika Nermina Purića, upućena informacija o stanju i problemima sa kojima se susreće Agencija za prevenciju korupcije i koordinaciju borbe protiv korupcije. Predstavnički dom Parlamentarne skupštine BiH, na sjednici 24. maja 2012. godine,

prihvatio je Informaciju o stanju i problemima u funkcioniranju Agencije za prevenciju korupcije i koordinaciju borbe protiv korupcije, uz zaduženje Vijeću ministara BiH da u roku od 15 dana treba usvojiti Pravilnik o unutrašnjoj organizaciji Agencije za prevenciju korupcije i koordinaciju borbe protiv korupcije.

Rukovodioci Agencije učestvovali su na brojnim konferencijama, seminarima radionicama, okruglim stolovima i prikupili brojne informacije o zastupljenosti korupcije u BiH. Na brojnim seminarima i konferencijama učestvovali su u svojstvu predavača odnosno uvodničara. Izdajamo najvažnije događaje na kojima su učestvovali rukovodioci Agencije:

- Zamjenik direktora 23. januara 2012. godine učestvovao je na “stručnom savjetovanju jačanja parlamenata u BiH”.
- Na poziv Ambasade Sjedinjenih Američkih Država a u organizaciji OPDAT i Centara za edukaciju sudija i tužilaca Federacije BiH i Republike Srpske, direktor Agencije 27. i 28. marta u Sarajevu učestvovao je na seminaru „Korupcija“ na kojem je tužioce iz BiH i SAD-a upoznao sa nadležnostima, aktivnostima i aktuelnim stanjem u Agenciji. Tokom seminara upriličen je sastanak direktora Agencije sa Ambasadorom SAD u BiH gosp. Moonom, na kojem je direktor Agencije ambasadora Moona upoznao sa aktuelnom situacijom oko implementacije Agencije.
- Zamjenik direktora 5. i 6. marta učestvovao je na radionici “Definisanje problema za slobodan pristup informacijama u BiH i preporuka za njihovo rješavanje” seminar je održan na Jahorini.
- Direktor Agencije i zamjenik direktora 7. marta 2012. godine održali su sastanak sa direktorom Nacionalnog centra uzbunjivača iz Vašingtona gospodinom Stivenom Konom, koji je u BiH boravio od 3. do 8. marta.
- Direktor Agencije 7. marta učestvovao je na okruglom stolu pod nazivom „Mapa puta za bolju zakonsku zaštitu uzbunjivača u BiH”, održanom u UNITIC centru u Sarajevu.
- Zamjenik direktora učestvovao je u radionici “Implementacija revidiranog Akcionog plana iz Strategije o reformi javne uprave”, koju je organizirala Agencija za državnu službu.
- Zamjenik direktora 28. marta učestvovao je u “Dijalogu o mjerama za brži put ka EU – od vizije do akcije “.
- U svojstvu predavača zamjenik direktora Agencije učestvovao u strateško političko-vojnom seminaru „Izgradnja integriteta i borba protiv korupcije u odbrambenim i sigurnosnim institucija“, koja je 28., 29. i 30. marta održana u Sarajevu.
- Direktor Agencije 2. aprila učestvovao je na sastanku na temu “Opći antikorupcijski plan u FBiH” na kome je raspravljano oko izrade strategije za borbu protiv korupcije u FBiH.
- Predstavnici Agencije 8. maja učestvovali na radionici “Planiranje i kandidovanje investicionih projekata za program javnih investicija”.
- Direktor Agencije 17. maja učestvovao je na sastanku sa predstavnicima Agencije za javne nabavke u vezi sa praćenjem i implementacijom Strategije za borbu protiv korupcije (2009.20014.) i Akcionog plana za njenu provedbu.

- Zamjenici direktora Agencije 22. maja prisustvovali su sjednici Komisije za izbor i praćenje rada Agencije na kojoj je razmatran izvještaj o radu Agencije za 2011. godinu.
- Zamjenik direktora 14. juna učestvovao je na skupštini internih revizora u BiH, na kojoj je bilo riječi o upravljanju finansijskim sredstvima u javnom sektoru.
- U svojstvu predavača zamjenik direktora održao je predavanje na temu "Integritet i korupcija" u sklopu obuke iz dokumenta "Sigurnosna politika BiH" 20.juna, a na poziv Misije OESC-a u BiH.
- Zamjenik direktora 25. juna učestvovao je na "Drugoj konferenciji o korupcija u javnim nabavkama" koje je organiziralo udruženje građana "Tender".
- Zamjenik direktora 27. juna učestvovao je u dijalogu za akciju o promociji mjera u visokom obrazovanju, koje je na Ekonomskom fakultetu u Sarajevu organiziralo Udruženje Generacija BiH za Evropu.
- U okviru projekta „Osnaživanje organizacija civilnog društva u BiH za borbu protiv korupcije : novi alati i razmjena regionalnog iskustva“, koji finansira Evropska unija, a organizira Centar za istraživačko novinarstvo (CIN), direktor Agencije 12. juna u Sarajevu učestvovao je na Forumu o antikorupciji.
- Zamjenik direktora sastao se sa gđom Emilijom Apostoloskom iz Crown Agents (Regionalni predstavnik za Jugoistočnu Evropu) održan juna 2012 godine. Na kojem su dogovarani modaliteti eventualne buduće saradnje.
- Direktor Agencije sastao se sa gđom. Sladjanom Taševom, bivšom predsjednicom makedonske Komisije za sprječavanje korupcije. Tim povodom razmijenjena su dragocjena iskustva u vezi sa sprječavanjem korupcije u ove dvije zemlje.
- Direktor Agencije učestvovao je na tri radionice u okviru provedbe projekta "pravne antikorupcijske mreže" u organizaciji Centra za civilno društvo "Kyodo".
- Direktor Agencije u izvještajnom periodu održao je nekoliko radno-konsultativnih sastanaka sa predsjednicom Komisije za izbor i praćenje rada Agencije gđom. Dušankom Majkić na kojima su razmatrana pitanja bitna za implementaciju Agencije.
- Održano je nekoliko radnih sastanaka sa predstavnicima EU u BiH oko realizacije projekta IPA 2009 koji u planu imaju jačanje institucionalnih kapaciteta Agencije.
- Tokom izvještajnog perioda obavljena je završna revizija finansijskog poslovanja Agencije od strane ureda za reviziju institucija BiH.
- U izvještajnom period otпочela je implementacija projekta IPA 2009 "Jačanje kapaciteta BiH institucija u borbi i prevenciji korupcije." Projekat se provodi kroz tri međusobno povezane i uslovljene aktivnosti. Prva aktivnost je jačanje institucionalnih i administrativnih kapaciteta Agencije u cilju ispunjavanja mandata i ciljeva. Druga aktivnost je poboljšanje antikorupcijskih kapaciteta i mehanizama saradnje institucija ovlaštenih za suzbijanje i sprečavanje korupcije na različitim upravnim nivoima i treća aktivnost je jačanje kapaciteta za suzbijanje korupcije u javnim institucijama i agencijama za provedbu zakona, kroz opsežnu obuku i stvaranje održivih kapaciteta za



obuku. Od početka otpočinjanja projekta kontinuirano se održavaju sastanci rukovodilaca Agencije sa ključnim ekspertima koji provode projekat.

- Blagovremeno je odgovoreno na sve zaprimljene zahtjeve za pristup informacijama.
- Postupljeno je po svim zahtjevima i zaključcima dostavljenim od strane Parlamentarne skupštine BiH i Vijeća ministara BiH.
- Kontinuirano su poduzimane aktivnosti na promociji Agencije i na upoznatosti javnosti o nadležnostima Agencije.
- Blagovremeno je postupljeno po svim instrukcijama pristiglim iz Ministarstva finansija i trezora BiH.

## **MEĐUNARODNE AKTIVNOSTI**

Budući da je jedna od zakonskih nadležnosti Agencije između ostalih i saradnja s međunarodnim organizacijama, institucijama, inicijativama predstavnici Agencije su u izvještajnom periodu imali i međunarodne aktivnosti kroz učešće na konferencijama istina u ograničenim mogućnostima,

- Direktor i zamjenik direktora Agencije 22 i 23. marta 2012. godine učestvovali su na "Prvom umrežavanju službenika na temu integracije i etike u javnoj upravi" koji je u Danilovgradu Crna Gora organizirala REsPA.
- Direktor Agencije 21. i 22. maja učestvovao je na konferenciji "Vladavina prava – implementacija sveobuhvatnog i integriranog pristupa u prevenciji i borbi protiv korupcije", koja je održana u Sofiji u Bugarskoj.

## **JAVNE NABAVKE**

U prvih šest mjeseci 2012. godine zbog kašnjenja u usvjanju budžeta za tekuću godinu, nije izvršena niti jedna procedura javnih nabavki.

Osigurana je jedna donacija od strane ICITAP, kojom su Agenciji donirana četiri računara. Tokom mjeseca juna vođeni su pregovori sa šefom misije i zamjenikom šefa misije EUPM u BiH oko eventualne donacije materijalno tehničkih sredstava i opreme koju je koristio EUPM tokom svoje misije u BiH a koja se zvanično završava 30.juna 2012. godine.

Naknadno se očekuje konačni stav po ovom pitanju.

## **FINANSIJSKO POSLOVANJE**

Finansiranje Agencije je vršeno na osnovu Odluke o privremenom finansiranju institucija BiH. Na početku prvog kvartala bilo je problema oko finansiranja iz razloga što je osnova bila potrošnja iz 2011. godine, a kao što je poznato rukovodstvo Agencije je otpočelo sa radom tek u august 2011. godine. Kada su se rasporedila utrošena sredstava iz 2011. godine kao osnova za finansiranje u 2012. godini po kvartalima nije bilo dovoljno sredstava za finansiranje svih obaveza u zadnjem mjesecu prvog kvartala. U saradnji sa Ministarstvom finansija i terzora BiH ti problemi su prevaziđeni. Blagovremeno smo na osnovu instrukcija ministarstva finansija i trezora BiH izradili Operativni plan Agencije za izvršenje Budžeta za 2012.godinu.